


H Pawlar





DE
HORATIO

LIBRARY
OF THE
UNIVERSITY OF ILLINOIS

INCREDIVLOSORE

AD

VERSVM CLXXXVIII

EPISTOLAE AD PISONES

DISPVAT

CHRISTIANVS HENRICVS PAVFLER

DRESDAE MDCCCXII

SVMTIBVS G. M. WALTHERI BIBLIOPOLAE RECH.

*S*cholastica indicturus solemnia, cum in tanta
legentium discrepantia, omnia enim non omni-
bus placent, dubius haererem, quamnam mihi
potissimum deligerem scribendi materiam, et le-
cturis dignam, et huic generi scripturae satis ido-
neam, incidi forte in Epistola Horatii ad Piso-
nes in locum, cujus interpretatio, quam vulgo de-
derunt, licet per se probabilis videatur, me sem-
per suspensum tenuit. Desiderantibus vero non-
nullis, ut, qui adhuc antiquitatum romanarum
pariculam illustraueram, rem tractarem gram-
maticam, his deesse nolui, satis persuasus, pii
esse praeceptoris versari cum omnibus, et ad
Pauli exemplum τοῖς πᾶσι γινέσθαι πάντα. Sed
cum vberius cogitarem de loco isto explicando,

tantam ille mihi suppeditauit disserendi materiam, ut, quod vna absolutum plagula me dare posse speraueram, in libellum accresceret meque cogeret superius deserere institutum. Quae igitur lectoribus harum rerum cupidis publice exhibere non poteram, repetens consilium a praesenti necessitate, priuatim edenda curauit. Habes itaque L. B. meam de isto loco sententiam, diuersam quidem a sententia reliquorum interpretum, quam tamen Tibi probare nullus dubitauit. Multi enim, qui iuuenes Horatium legere et intelligere instituunt, in verba solent iurare magistri ac temere credere interpretibus. Hinc fit, ut plurimi quidem cogitent de argumentis, quibus opinionem receptam possint tueri, pauci vero suis uti velint oculis, nec audeant in sententiam inueteratam denuo inquirere iusta ratione; calumniam praesertim verentes et malignum notandi studium, quo flagrant omnes, qui sibi solis placent, et doctrinae fastu inflati sententiam minime improbandam, sed a sua alienam animo aequo ferre nequeunt. Nam plerique, ait Cicero, errare malunt, eamque sententiam, quam adamarunt, pugnacissime defendere, quam sine pertinacia, quid constan-

tissime dicatur, exquirere. Sic omnes fere rapimur opinionibus in errorem. Illud, quod est, qualecunque est, probamus; melius esse haud sentimus. Auctoritate mouemur, ut id verum putemus, quod a plerisque laudatur. Aetatis spatio aut dignitate probatos, quibus credatur, praecipue dignos arbitramur. Veritas, quae antiquorum libris continetur, recte comparatur cum Oceano immenso, qui oram legentibus facili negotio traiiciendus videtur. Interim, puerorum instar ludentium, sedet ad littus congregata criticorum caterua, conchisque et lapillis delectatur nitidissimis atque pulcherrimis ibi repertis. Qui, quae reuera sunt, haec crepundia putant, plurimum vidisse videntur: qui vero hac ratione minime contenti, ulterius tendunt, sibi que nouum ludi genus fingunt, apportantes e longinquo lapides in sicco aridoque loco anxie collectos, quibus per aequoris superficiem ingenti vi brachiorum libratis gaudeant, spe fore, ut hac ratione veritas eo magis innotescat et cum lapide ab ipsis immisso quasi exsiliat, ii non infantiores, sed petulantiores iure existimantur. Cum vero omnes, quicunque in hanc arenam descen-

dunt, pro sua quisque ratione atque ingenio, ludere soleant, nos hoc nostro ludo neminem veremur offensum iri, nisi forte eum, qui, vel sibi soli vindicaturus hanc ludendi intelligentiam, nos iudicet ludi ignaros, vel loco pulsus, quod a nostro animo atque consilio longissime abest, se elusum a nobis temere credat. Nos enim, si quid errauimus, est vero errare cuiusuis hominis, refelli redarguique libenter patimur: quod, ut cum Cicerone loquar, illi tantum ferent animo iniquo, qui certis quibusdam destinatisque sententiis quasi addicii et consecrati sunt, eaque necessitate constricti, ut etiam, quae non probare soleant, ea cogantur constantiae causa defendere. Horum iudicio, fulgeat licet ingenii acumine, non mouemur. Est quidem ingenium hominis decus, sed ingenii lumen probitas. Quare nullum miramur ingenium, quod probitate non illustretur.

Quoties ego illam Horatii ad Pisones
perlegi epistolam, toties in eo haesitavi
loco, quo, quae in scenis agenda, quae
acta sint referenda, poëta docet exem-
plis. Altero enim immania atque cru-
delia promi in scenam vetare videtur,
repugnantia atque absurda altero.

Ne pueros coram populo Medea
trucidet,
aut humana palam coquat exta
nefarius Atreus,
aut in auem Progne vertatur,
Cadmus in anguem.

Quodcunque ostendis mihi
sic; incredulus odi.

Omnes fere interpretes, quorum de
his versibus scimus sententiam, haec
ultima verba ita intelligunt, vt cum
ASCENSIO, GRIFOLO, LAMBINO, LUBINO,

LUISINO et aliis, illas res vel in vniuersum pronuntient incredibiles, odioque dignas, et propterea a scena remouendas; vel LANDINI, PISCATORIS, STURMII, SAHLII, aliorum auctoritatem sequentes, inter vtramque vocem distinguant, trahantque alteram, nempe incredulitatis, ad Progen et Cadmum, ex hominibus praeter naturam in animalia mutatos, alteram, odii scilicet, ad Medae et Atrei nefaria facinora, quippe quae ex oculis spectatorum sublata et intus geri digna, praesens facundia melius narret. VNUS PORPHYRION: neque decet, inquit, hoc ipsa in scena fieri, alioquin incipit verus actus fieri, non fabula; quod, vti vulgo intelligitur, ab homine, ceteroquin acuto, vix cogitatum, nedum scriptum putem.

Hinc quoque factum esse videtur, vt, qui e latina in alias linguas transtulerunt Horatium, istum locum vel totidem verbis, vel saltem ita expresserint,

vt ejusmodi res, coram populo peractas, et incredibiles et odio dignas a poëta iudicatas esse dicant. Audiamus primum e Germanis RAMLERUM, qui verba poëtae latina, sic germanice reddidit: *Diese Vorstellungen würden nicht geglaubt werden, und also auch nicht gefallen.* STARKE pressius:

Das kann ich und mag ich nicht glauben.

A REGELSBERGERO versa ita leguntur:

Alles was so man mir zeigt, dies glaub' ich nimmer und hass' es.

HABERFELD, qui multa et praeclara ad hunc locum monet, quomodo intellexerit Horatii verba, ita suis expressit: *Solche Darstellungen sind entweder unwahrscheinlich, oder erwecken Ekel und Abscheu.* Miror a WIELANDO hunc versum plane omissum. VOSSIUS habet:

Was du mir so vorführst, o hinweg! unglaublich veracht ich's.

SANADON, Franco-Gallus, Horatium sua lingua ita interpretatus est:

On ne croit rien de tout cela , et la vue même ne peut qu'en inspirer de l'aversion. BATTEUX: cette maniere de les présenter seroit odieuse et détruiroit l'illusion. DACIER: Tout ce que vous me présentez de cette maniere, je le hais, et ne le crois point. Ac ne quis de vera Dacerii sententia dubitet, is verba sua ita interpretatus est in Notis: Horace ne se contente pas de donner le précepte, il en donne aussi la raison. C'est que ces choses prodigieuses exposées aux yeux deviennent incroyables & font tomber la tragédie: elles ne sont supportables que dans les recits, où la fable leur donne un passeport.

DARU quae cogitauerit, ita est elocutus:

En voyant ces tableaux, ma raison s'en défie.

BORGIANELLI, Italus, Horatium facit ita loquentem:

*che se ciò si addita,
Incredulo devengo et nauseato.*

PASQUALII interpretatio est:

*in guisa tal quanto mi mostri,
Fra che incredul di leggi, e in odio io prenda.*

PATRINII expositio:

Ciò, che così mi mostri, odio e non credo.

En quoque Hispanum DE YRI-
ARTE, qui sensum illorum verborum
exposuit sic: *Repugnantes me son, y non los
creo. — Anglorum sistimus vnum, DUN-
STERUM, qui his verbis vsus est: I
hate to see such Things upon the Stage, they
are Idle and Romantick. Licuit quoque
consulere interpretationem VONDELII,
Bataui, qui poëtae verba ita reddidit:
Al watge my zoo vertoont, dat haet ik, als een
die het nit geloofst.*

Omnes manifestam arbitrantur hu-
jus interpretationis rationem. Neminem
enim posse negare, nefaria atque crudelia
esse odio digna, mutata vero corpora in
formas repugnantes incredibilia atque
absurda. Ferri quidem talia, cum relata
vel legantur vel audiantur: eadem vero
spectatorum oculis subiecta minime
posse placere. Sed cum nefaria crudeli-
tatis facinora, siue oculis subiecta, siue
auribus tradita, liberaliorum hominum

in se semper incendant odium, et quae nullam ostendunt veritatis imaginem, qualia sunt, quae e fabulosa antiquitate commemorat Horatius exempla, siue audias ea, siue videas, semper sint ejusmodi, vt fide prorsus careant; nullam enim, ait Cicero, auctoritatem debemus, nec fidem commentitiis rebus adiungere: nescio, qui fiat, vt Horatius, vel quicumque alius spectator, ex illorum interpretum sententia, mendaciis portentosis ac nefarie factis credulas prebeat aures, non idem oculos ad credendum paratos, cum tamen ipse poëta habeat haec:

Segnius irritant animos de-
missa per aurem,
quam quae sunt oculis subiecta
fidelibus, et quae
ipse sibi tradit spectator;

teste vero SENECA, homines plus oculis soleant credere, quam auribus, faciliusque, Ciceroni si fides habenda est, ad ea, quae visa, quam ad illa, quae audita

sunt, oculi mentis ferantur. Augere
 quidem, quod idem Cicero testatur, do-
 lorem oculi, qui ea, quae ceteri audi-
 unt, intueri coguntur, vt tolerabilius
 sit, acerbam audire, quam videre; qua
 tamen re nec augeri potest nec minui
 fides, quae firma nititur opinione ac per-
 suasione de rei veritate, cuius tanta est
 vis, vt nullis machinis, nec cuiusquam
 hominis ingenio aut arte subuerti possit.

Sed vt concedamus, fidem dolore,
 e rebus visis percepto, posse imminui,
 vocat enim Horatius amorem rem cre-
 dulam, vt incredulam rem iure possis
 vocare dolorem et odium; quod tamen
 longe secus est in fabulis: quid tandem,
 quod ad tuendam illorum interpretum
 sententiam dici possit, relinquitur,
 cum intelligamus Romanos, qui callum
 quasi sensibus obdlexerant, non tan-
 tum diuturno gladiatorum vsu et con-
 suetudine *Σαυματοποιῶν*, de quibus con-
 sulendus est BULENGERUS, sed exem-
 plis quoque ciuium suorum, in suos

aliosque crudeliter seuientium, satis fuisse adsuetos miraculis et caedibus cruentis, ut ejusmodi spectacula vel in scena exhibita, vel a poetis viuidis coloribus depicta et quasi ante oculos posita, animos eorum non turbarent, sed delectarent? Huius generis est pugna Lapitharum cum Centauris, ab Ouidio conuenienter descripta, quam olim fabulam, Caenei titulo inscriptam, de qua videndus est PETITUS in Miscellaneis, docuerat Antiphanes. Nil dicam de iis scenae et vitae ludibriis, quae DURANTIUS CASELLIUS Variorum Libro Primo collegit. Vereor enim cum illo, ne potior fuerit ratio istorum qui eiusmodi monstris oblectantur, quam eorum, qui in his cognoscendis abutuntur tempore, labore et ingenio.

Nec mirum: omnes enim omnium temporum homines, inertis otio atque luxuria deprauati, semper adamarunt mira, portentosa, incredibilia, varie

mixta, atrocia atque horrenda, vt nostra adeo aetate haud pauci fuerint, et adhuc sint, qui libidinibus inflammati atque furentes, rabide appetant, cum inexplebili quadam cupiditate fabulas lemuribus, incantationibus, latrociniis, caedibus ac sanguine plenas. Ne quis veritatem criminetur, testem habeo satis locupletem, AUGUSTUM DE KOTZEBUE, qui in praefatione libelli *Chroniken* inscripti, statim ab initio his utitur verbis: *Drum gehe hin, mein Söhnlein, in Gottes Namen! Erzähle den Leuten, was sie immer gern hörten: Feuer und Wassersnoth, Belagerungen, Mordthaten, Gespenstermärchen, Schiffbrüche, u. s: w.* LAMY scriptor gallicus, obliuioni immerito traditus, idem fere dixit: *L'expérience fait connoître, que le peuple a une passion très-ardente pour ce qui s'appelle Spectacle, c'est à dire, pour les choses extraordinaires, qui font des grandes impressions sur les sens, et qu'indifféremment il regarde avec curiosité ce qui lui semble nouveau.* In quo igitur homines exhorrescunt, quod stu-

pefacti intuentur, in quo exclamant, qui placere cupiunt poëtae, id potissimum in scenam producant necesse est.

Quod quamquam diuturna notatur observatione, insitus tamen est et innatus hominibus pulchri atque decori sensus, siue potius ingenii vel mentis acumen, quo quis instructus, quid in quacunque re aptum et decorum sit, prudenter et celeriter videat, fugiatque oculis, vel saltem aegre adspiciat res, quibus offenditur, naturae contrarias et ab omni humanitate alienas: cujus generis sunt mutata in novas formas corpora, et infanticidia ab ipsis parentibus vel cognatis crudeliter perpetrata, quamquam non ita rara, ut memoriam penitus fugiant. Sunt, qui cum antiquo CRUQUII Interprete, CHABOTIO et aliis, huic humanitatis sensui mentisque acumen illa Horatii lege cautum dicant, quibuscum facere videntur BERNHARDUS LAMY et IASON DE NORES, in sua interpretatione e quotidianis TRYPHONIS

GABRIELII sermonibus desumta. Ille enim libelli sui de arte poetica, (*Reflexions sur l'art poétique*) Parte altera, Capite quidem septimo: *Les maîtres de l'art, inquit, ne veulent pas aussi qu'on fasse paroître sur la scene ce qui pourroit faire peine. — Ils veulent pareillement que l'on cache et que l'on ne représente pas de certaines actions odieuses qui blessent les yeux, parcequ'elles sont contre la bienséance et l'honêteté, et que l'on cache et que l'on ne pourroit les considérer sans sentir en même tems la modestie offensée et sa conscience blessée.* IASON vero, disputans contra eos, qui de SPARONIS Tragoedia, *Canace e Macareo* italice dicta, inique iudicauerant, inter alia dicit haec: Praeterea minus etiam terribile, aut miserabile videri illud genus Tragoediae, quod a scenae apparatu proficiscitur, affirmare possemus, quia adimit fidem. Ademta autem fide, adimitur omnis et terror et misericordia. Nam quem admodum res verae magis mo-

uent, si videntur, *vel in rerum natura,*
vel probe imitatae, quae verba perperam
 ille omisit, quam si relatae ab aliis
 audiuntur: ita etiam fictae, ite-
 rum addere debuisset, *male imitatae,* ri-
 sum potius, quam terrorem aut
 misericordiam concitabunt. Si
 forte sint, qui a me addita in dubium vo-
 care conentur, legant, quem cum risu
 exceperunt, et cum admiratione dimise-
 runt Veneti, Italum poëtam GOZZIUM,
 qui feliciter usus est apparatu scenico ad
 effingendas agendasque res incredibiles
 et pene ridiculas; sint porro praesentes
 nostris in theatris, quando, exempli
 causa, agitur Elisa, fabula melica a
 MAYRO modis aptata, videantque niuem
 effundi, iuuenemque reuulsa niuium
 mole abreptum altissimo de loco se dare
 praecipitem; videant incendia, pugnas,
 caedes, miracula, et quae sunt hujus ge-
 neris sexcenta alia, aliis in fabulis, prae-
 cipue in Fausto obuia, quam fabulam
 KLINGEMANNUS nuper docuit; quae qui

intelligit rebus ipsis conuenientia et recte expressa, nemo non miratur. Qui igitur hoc loco urgent sensum illum humanitatis, mihi quoque versari videntur in errore. Nam, cum quae non deceant, humanitatis displiceant visa, audita quoque displicere stomachumque mouere debeant, quomodo, qui spectaculis noluerit obesse humanitati, huic prodesse possit praesenti facundia, id exputare non possum. Tantum denique abest, quod iam ARISTOTELES obseruauit, ut homines ab iis, quae in rerum natura spectant cum dolore atque molestia, ita abhorreant, ut ea videre nolint, ut gaudeant potius intueri ista affabre imitata. Verba illius sunt, de arte poetica: ἃ γὰρ αὐτὰ λυπηρῶς ὁρῶμεν, τέτων τὰς εἰκόνας τὰς μάλιστα ἠκριβωμένας χαίρομεν θεωροῦντες. Quod probe nouerat SENECA TRAGICUS, ex hoc Horatii loco a nonnullis notatus, qui Medeam natorum membra crudeliter dilacerantem in scenam insit prodire.

Quare non possum adduci, ut antiquorum illorum populorum humanitatem penitus eandem, fuisse credam, quam colunt homines liberaliter educati nostrae aetatis quippe puriori religionis doctrina illustratae. Qui enim sanguine et caede Deos placare student, quamquam non omnem humanitatis sensum amiserint, a vera tamen humanitate iure habentur alieni. Nos vero, inde a pueris ad veram humanitatem, vel nescientes, informati, quod, cui potissimum debent, acceptum referunt pauci, plurimi, cum nonnulli literarum studiosi veram humanitatem ignorare videantur, minus recte tribuunt studiis, quae vulgo dicuntur humanitatis, omnia solemus iudicare e nostra ratione, quam non alienam putamus, quod amoris et caritatis est, ab omnibus iis, quorum et agendi et sentiendi cogitandique ratio proxime ad nostram accedere videtur.

Restat, ut pauca adhuc moneam de sententia eorum, qui rerum mirabilium

imitationem et fabulis in scena exhibitis et spectatorum illusioni, quam vocant, obesse contendunt. Vix video, quid velint, nisi intelligant ineptam imitandirationem, quae quidem haud maius potest excitare taedium, quam quod mouet ineptum narrandi studium. Quod igitur hac in re peccatur, non actione peccatur, sed inepta agendi ratione, quam nemo sanus ac prudens villo in loco admittet. Nec potest fabula veniam impetrare narrationi ineptae, quae ab eo, quod decet, recedit et in rebus exponendis friuolam sequitur rationem. Hinc, quam concedimus narrationi veniam, hanc non damus isti, tanquam narrationi, sed quod intelligimus eam sanam, aptam, probam, perfectam et absolutam. Si vero eandem rem, sive veram, sive fabulosam, quam probe enarratam cum voluptate audiui-
mus, possimus quoque oculis spectare, ab homine, qui ingenio et arte valet, proba actionis imitatione conuenienter

expressam, cur id inprobemus, non video. Alia igitur lex est quaerenda, ex qua illud Horatii praeceptum conuenientius possit explicari.

Quae cum ita sint, inueteratam illam et antiquitus susceptam deserere non dubitavi opinionem istorum interpretum, qui primam praecepti Horatiani causam indagantes, eam cum honestatis ac sapientiae magistris quaerunt in intimo hominis pectore communique humanitatis sensu, quem non recte perspectum, grauius affici oculorum quam aurium iudicio temere pronuntiant. Nec ab eorum partibus stare possum, qui hoc genere actionis, omnem veri speciem tolli contendunt. Placet potius cum ARISTOTELE, oratorum ac poëtarum praeceptore, omnem illius praecepti rationem petere ab arte, quarum in suo quaeque genere perfecta esse debet, hoc est sibi sufficiens, vt nihil desit, quod ab aliis artibus anxie debeat mutuari. Semper enim, vt ait CICERO, qua-

cunque de arte aut facultate quaeritur, de absoluta et perfecta quaeri solet. — Vis enim et natura rei, nisi perfecta ante oculos ponitur, qualis et quanta sit, intelligi non potest. Contra alios igitur pro mea sententia disputaturus, faciam id animo bono atque modesto, ut in sententiarum disiunctione humanitate maneamus coniuncti. Absit enim, ut alicuius aut manes lacescam, aut de fama adhuc viventium improbus detrahā, aut, quod summae esset arrogantiae, cornicum, ut dicitur, oculos configere velle videar. Libenter lego et laude prosequor, quibus conscribendis docti ac probi viri insudauere. Errores tantum agnoscere, non culpāre soleo, neque in errore versantem ab aliis corrigi libenter patior, modo id fiat non minuendae, sed mitigandae auctoritatis gratia. Non enim sum e numero eorum, qui suo iudicio contenti, aliorum iudicia spernunt. Mihi cum Plinio iuniore

modestior est conscientia, quam ut satis absolutum patem, quod a me probetur. Qui vero omnia odio et iracundia iudicant ac nequeunt se prohibere ab iniuria, merito veniant in contemtionem. Quid enim sapientia atque doctrina habet commune cum Cane illo Stygio, qui neque ab Hercule, ferarum domitore, ex Orco ad Superos reductus, neque sedatus ab Orpheo et Musis, humanitatem suadentibus, sed a Dirarum sororum vna nefarie immissus, faucibus improba petit omnes, qui inhianti non litant, aut pessime latrantem lusciniæ instar canere negant? Cum hoc mihi nulla causa intercedit. Vlulet antique, latret antique, faciat antique reliqua omnia, et hac ratione prodat ingenium suum; caueat modo, insanabile caput, ne in cineres proborum, — impetret Horatius veniam vocabulo in re foedissima foedo, — mictum antique veniat. Idem ego nec eos moror, qui invidentis animi poenam luentes, si quid ab his, ut MAMERTI ver-

ba mea faciam, quos iniquo laces-
sunt odio, ad utilitatem publicam
veri prodatur, diuersum protinus
adstruunt, etsi idem sentiant. Isto-
rum hominum perversitas non argumen-
tis et iustitia conuincitur, sed aliter po-
tius disputando et probitate: quare eos
mittamus et ad sententiam nostram ex-
ponendam reuertamur.

Liquet HORATIUM in illa Epistola
ad Pisones totum esse in arte, eaque
potissimum tractare praecepta, quae ex
artificio quaeruntur. Hinc statim ab ini-
tio carminis sui cecinit:

In vitium ducit culpa fuga, si
caret arte.

Et paulo inferius:

Sic priscae motumque et luxu-
riam addidit arti
tibicen.

Nullum autem haberemus vel artis vel
disciplinae cuiusvis artificium, licet sint,
qui e philosophia quadam, in qua vitae
suae quasi tabernaculum collocant, hanc

sententiam solent impugnare, nisi ea,
 quae sponte sua hominibus visa sunt
 perfecta et omnibus numeris absoluta, di-
 ligenter a quibusdam fuissent et observa-
 ta et commendata, vt artem non ex artifi-
 cio, sed artificium ex arte natum intelliga-
 mus. Quis enim est, qui ignoret, Horatii
 artificium a Graecis esse deductum: et-
 si PORPHYRION non annotasset, cuius
 auctoritatem ille in Epistola ad Pisones
 sit secutus? Congessit nempe in suum
 librum praecepta NEOPTOLEMI de arte
 poëtica, non quidem omnia, sed emi-
 nentissima. Ipse vero, vt reliqua taceam,
 vos, inquit, exemplaria graeca
 nocturna versate manu, versate
 diurna.

Nam

Graiiis ingenium, Graiis dedit
 ore rotundo

Musa loqui, praeter laudem nul-
 lius auaris.

Hinc, quae forte apud Graecos non
 fuerant in usu, ab Horatio ea quoque

contemni, non est, quod miremur, cum neminem esse puto ita lenem, qui, quae semel arriserint artificii praecepta artemque inuerint, soleat abiicere, praesertim cum forte nihil habeat, quo amissa commodè possint suppleri. Verum enim, quod alii poëtarum antiquorum lectores iam obseruarunt, Graecorum nullus nec caedes nefandas, AESCHYLO auctore, qui, teste PHILOSTRATO, caedes post scenam, non in omnium oculis patrari instituit, nec commutationes turpes oculis spectatorum in scena subiecit: duabus potissimum, ni fallor, de causis, vel quod iustus et idoneus scenae apparatus, quo sine oculorum offensione, vere et ad viuum ejusmodi spectacula exhiberi poterant, non desiderabatur a spectatoribus mente et cogitatione affluentibus, qui artem iambo ARCHILOCHI et THESPIS plaustro inuectam emendandam modo censebant: vel quod poëtarum ingenia sibi non quaerebant laudem ex machinis, quas diligentissime exposuit

BOETTIGERUS in Deo ex machina, sed potius inclarescere studebant fulgore carminum, et, quam HORATIUS dicit, diuite vena. Quod comprobat noster, cum dicit: interdum speciosa locis etc. ARISTOTELES vero his verbis: δῆλον ὅτι ἐκ τέτων, ὅτι τὸν ποιητὴν μᾶλλον τῶν μύθων εἶναι δεῖ ποιητὴν, ἢ τῶν μέτρων, ὅσω ποιητὴς κατὰ τὴν μίμησιν ἐστίν.

Constat autem et Graecorum et Romanorum theatra primum fuisse simplicissima. Romae enim CLAUDIUS PULCHER primus theatra picturis exornauit, vt splendidissima quidem inde ab illo tempore, sed sumtuoso apparatu magis essent conspicua, quam vtili et necessario. Graeci fero, quibus AGATHARCHUS, vt VITRUVIUS scribit, primum, docente Aeschylō tragoediam, scenam fecit, ad aciem oculorum radiorumque extensionem certo loco centro constituto ad lineas ratione naturali respondentem, quo scenae apparatu vsi sint, colligi potest e POLLUCE, quem qui pleniorē

optant, possunt tamen satis intelligere, quod etiam libenter concedunt, nostrae aetatis artem ad fallendos spectatorum oculos, Graecorum apparatu esse longe aptiorem ac perfectiorem. Hanc cum ignorarent antiqui, vti noluerunt illa, quam imperfectam intelligebant, nec satis dignam poetis tragicis, qui fabula et carmine, non miraculis et apparatu ingenium rite ostendebant.

Et profecto est ad commouendos animos quaedam orationis et carminis vis, qua sola actionis imitatio penitus est destituta. Quare etiam Socrates et Lactantius plus auribus dedisse videntur, quam oculis. Sermone enim, qui animi est simulacrum atque interpretes, solus homo gaudet, cetera vero animalia, quae cum hominibus multa habent communia, prorsus carent. Orationis beneficio mens sua enuntiat cogitata, optata, decreta; sua declarat consilia, voluntates, sententias iis, ad quos nec frons, nec oculi, nec nutus, nec gestus, qui reli-

qui sunt mentis indices ac nuntii, possunt humana vlla industria pertingere. Et cum, quidquid in scena agitur, sit vitae humanae imitatio, consuetudinis speculum, veritatis atque rationis, quae omnis vita humana constat, imago, neminem esse puto, qui cum Musis, id est cum humanitate habeat aliquod commercium, qui non velit vti sermone interprete, gaudeatque oratione, quoties vel imitando exprimere studet hominum mores, vel in alienis personis optat videre effictos, intuerique expressam vitae imaginem. Imperfecta enim est, et, ut ita dicam, inhumana, omnis vitae adumbratio, quae sola actione perficitur; mouet quidem spectantium animos, sed parum vel perperam intellecta non edocet, auocat potius mentem celerem a rationis atque probitatis contemplatione eamque nunc huc, nunc illuc diuidit. Quodcunque vero non absoluitur mente et cogitatione, licet sensus vel suauissime titillet, vel afficiat grauissime,

non ad hominem pertinet, sed ad eam tantum hominis partem, quam communem habemus cum brutis. Quare etiam, quam causam praeclarissime peroravit Crassus apud Ciceronem, populi antiquissimi maluerunt ciuitates regi oratione, quam vi et manu; et qui olim tentatus fuerat iocus, quod

illecebris erat et grata nouitate
morandus

spectator functusque sacris et
potus et exlex,

mox conuersus est ad hominum salutem, scenaeque, religionis pars, prudentissime instituta ad regendas oratione ciuitates, moresque ciuium carmine recte formandos. Qua de causa tam multas, tam praeclaras, tam veras, tam graues legimus sententias apud poëtas scenicos, qui prudenti consilio vitam monere volebant, collectas ex Euripide a MICHAELE NEANDRO in Aristologia Euripidea, e comicis graecis et latinis ab HENRICO STEPHANO et aliis. Hinc fa-

ctum est, quod ipse praecepit ARISTOTELES, vt poëtae antiqui maluerint placere oratione, quam actione. Potiora tantum huc pertinentia ex ARISTOTELE delibabo. Ἡ τραγωδία, inquit, καὶ ἄνευ κινήσεως ποιεῖ τὸ αὐτῆς, ὥσπερ ἡ ἐποποιία. Διὰ γὰρ τῆς ἀναγινώσκειν Φανερά ὅποια τίς ἐστίν. Porro: ἡ γὰρ τῆς τραγωδίας δύναμις, καὶ ἄνευ ἀγῶνος καὶ ὑποκριτῶν ἐστίν. Alio denique loco: ἐστὶ μὲν ἔν τῷ Φοβερὸν καὶ ἑλεεινὸν ἐκ τῆς ὀψεως γίνεσθαι. ἐστὶ δὲ καὶ ἐξ αὐτῆς τῆς συζάσεως τῶν πραγμάτων. ὅπερ ἐστὶ πρότερον καὶ ποιητῆς ἀμείνονος. δεῖ γὰρ καὶ ἄνευ τῆς ὁρᾶν ἔτιω συνεχᾶναι τὸν μῦθον, ὥς τε τὸν ἀκρόντα τὰ πράγματα γινόμενα, καὶ Φρίττειν καὶ ἑλεεῖν ἐν τῶν συμβαινόντων. Ad quem ARISTOTELIS locum longam habet expositionem LESSINGIUS in Dramaturgia lectu dignam. ARISTOTELEM vero, cum haec praeciperet, non errasse, quod nonnulli volunt, satis apparet e supra dictis et e fabulis Graecorum tragicis, quae ad nostram peruenerunt aetatem, earumque inprimis forma. Idem iudicasse videtur SULZERUS, qui in Libro suo de Artibus, sub

voce *Handlung*, posuit haec: *Das Interessante der Handlung muss nicht im Aeusserlichen derselben, sondern in dem, was zum Geist und zum innern Character der Sachen gehört, gesucht werden.*

Hinc etiam Horatius, ad Graecorum exempla, poëtis commendat praesentem facundiam, hoc est, quae res, veluti visas, sententiose enarret, seque incredulum profitetur osorem illius artis, quae non orationis elegantia placere ornatuque carminis satisfacere studet spectatoribus, sed actionis imitatione laborat iuvare veritatem fidemque conciliare rebus intus geri dignis, hoc est satis notis et post scenam peragendis, quippe quae machinatorum tantum opera subiici possint oculis fidelibus; quod, teste ARISTOTELE, magis choragi est, quam poëtae. Verba ARISTOTELIS sunt: ἐπεὶ δὲ πράττοντες ποιῶνται τὴν μίμησιν, πρῶτον μὲν ἐξ ἀνάγκης ἂν εἴη τι μῦθον τραγωδίας ὁ τῆς ὀψέως κόσμος. εἴτα μελοποιία καὶ λέξις. — ἐτι δὲ κυριώτερα περὶ τὴν ἀπεργασίαν τῶν ὀψέων ἢ τῇ

σκευοποιῶ τέχνη τῆς τῶν ποιητῶν ἐστὶ. Ex quo
ARISTOTELIS praecepto interpreter illud
HORATII:

Quodcunque ostendis mi-
hi sic, incredulus odi,

Vsus nempe est poëta sententiosus, cum haec scriberet breuiloquentia, quam Graeci βραχυλογία vocant, cujus quidem rarior et negligentior apud Grammaticos est observatio. Quam si plenam optas atque copiosam, sic se habeat oratio necesse est: quodcunque ostendis mihi sic, id est, hoc modo, hac peruersa tua arte in scenam productum, quae quidem τῷ σκευοποιῶ, sed non poëtae est, et quae a Graecorum vsu longissime distat, non probo, nec vera arte elaboratum credo, sed quam detestor a scena, odioque censeo dignam. Displicet ea, ceu male sana, inepta et discrepans ab arte illius, qui cum laude ponitur

inter amabiles vatum choros. Rebus enim commentitiis et fabulosis, quas quisque habet cognitae et iudicatas, hoc modo maiorem, quam praesenti facundia conciliare velle fidem, absurdum et a Graecorum ratione, quos solos fas est sequi, alienum est, licet hunc artistuae errorem defendas illo Stoicorum: τὰ δ' ὁμμάτων Φαινόμενα πιστότερα εἶναι τῶν ὧν δοκεῖ. Non enim est poëtae conciliare fidem, quam vulgo vocant historicam, factis, sed praeceptis, quae e rebus gestis fluunt, et quibus verus vitae usus in omnes partes confirmatur.

Hanc meam interpretationem tueri videntur non tantum HORATIUS ipse, sed etiam ACRON, a reliquis interpretibus vel parum lectus vel intellectus perperam. Hic enim explicandi causa nostro loco adscripsit: non credens sic

debere fieri, ac per hoc sperno atque contemno; quae verba, qui velit de rebus ipsis intelligere, non de arte, qua res in scenam producuntur, praepostere agere videtur. Ille vero, qui poëtas praecipiendo breues esse docet, si iam nostro in loco de rebus fide haud dignis praecepisset, hoc vno praecepto contentus, non denuo idem affirmare tentasset his verbis:

non quodcunque volet, poscat
sibi fabula credi:

neu pransae Lamiae vium puerum
extrahat aluo.

Nec alium sensum admittit ratio grammatica. Praecipit nempe poëta de modo in scena proponendi his verbis:

aut agitur res in scenis aut acta
refertur,

eumque duplicem esse declarat, aut actionis, aut relationis siue narrationis. Narranda censet omnia intus

geri digna, quae multa esse innuit, non atrocia, nefaria et incredibilia sola. Tum hanc praecepti partem exemplis illustrat, quae illustratio, non e nostra ratione interpretanda, sed e consuetudine illorum temporum, saluo praecepti sensu abesse possit, et addit iudicium, quod non exempla illustrandi causa apposita eorumque naturam, sed in vniuersum aberrationem ab illo praecepto spectat. Hinc odii notio, in illo iudicio, non est coniungenda cum nefarie factis Medae et Atrei, quamquam sua natura odio maxime dignis, nec incredulitatis cum mutato Cadmo et Progne, rebus per se incredibilibus, sed pertinet illa ad modum istum peruersum, quo a poëtis, graecam rationem vel ignorantibus vel negligentibus, contra omnem consuetudinem antiquitus receptam, ejusmodi res in scenam promuntur. Hunc modum odio dignum censet Horatius, seque simul profitetur incredulum, arguens consilium, quod sequi solent

qui in hunc scenæ errorem inciderint, spe fore, vt oculis fidelibus subiecta citius ac grauius irritent animos, quam auribus tradita.

Neque huic explicationi aduersatur particula prohibitiua ne, quam BENTLEIUS, Codicum auctoritate permotus, pro nec in textum recepit. Pendet enim illa ab ipso praecepto ejusque indole, non ab exemplis et eorum natura; quam opinionem, supra satis refutatam, BENTLEIUS quoque sequi videtur. Ita enim in Notis ad hunc locum scripsit: Tolles, inquit (Horatius) ex oculis; ne, *ὡς μὴ* coram populo nefaria illa et incredibilia ostendantur. De BAXTERO vero, qui incredibilia referenda quidem putat, non ostendenda, non est, quod moneamus.

Liceat potius huc pauca quaedam addere de eo, quod ex antiqua ratione decebat. Ab institutis majorum discedere, semper nefas putabatur; hinc consuetudinis religio et sanctitas. De eo,

quod in omni vita et arte deceat, iam a veteribus multa sunt disputata. Roscius, ut est apud CICERONEM de Optimo Oratore, dicere solebat, caput esse artis, decere; quod tamen vnum id esse, quod tradi arte non possit. Sunt, qui e Cicerone dicant, hac voce significari aptitudinem, honestatem, conuenientiam, quae in re quaque insit ratione alterius rei; *πρέπον* Graecis, Quintiliano urbanum dicitur: sed omni hac disputatione non elicitur, quid sit decorum suapte natura. Equidem dicerem, quae apta et decora vulgo dicuntur, consentanea rationi, eo sensu, quo nostratium nonnulli hac voce vsi sunt in disputationibus suis philosophicis, nisi et hujus vocabuli notio suas haberet difficultates, quas acute et subtiliter erutas solent calumniari, quibus non datum est eas statim intelligere: non enim cuius licet adire Corinthum. Recentiorum nonnulli id appellare consueuerunt pulchrum atque decorum,

quod vel naturae consentaneum in rebus arte imitandis non probe negligitur, vel aptum atque conueniens est menti et animo illius, qui omnia e consilii cuiusdam ratione peragere solet. Quem ergo deprehenderimus ab hac ratione discrepantem, eum contra decorum peccasse recte pronuntiabimus. Quod autem fuerit antiquorum poetarum consilium in pangendis carminibus fabulisque docendis, satis intelligitur e supra dictis, et ex illis HORATII:

Fuit haec sapientia quondam,
 publica priuatis secernere, sa-
 cra profanis,
 concubitu prohibere vago, dare
 iura maritis,
 oppida moliri, leges incidere
 ligno,
 sic honor et nomen diuinis va-
 tibus atque
 carminibus venit.
 Et alio in loco:

Os tenerum pueri, etc.

Edocere nempe populum volebant poëtae, vitamque prudenti monere consilio. Hinc omnia a scena recte iudicabant amouenda, quae animos spectatorum turbarent mentemque a doctrina percipienda abstraherent longius; nihil enim est difficilius, quam a consuetudine oculorum mentis aciem abducere. Hac lege semel reperta, ceteri poëtae, qui placere volebant, ex illius ratione, fabulas suas atque carmina perficere studebant, et postea consuetudo facta est altera natura, quae praescriberet, quid in quacunque re deceret. Testem huius argumenti habemus VITRUVIUM, qui decorum ejus artis, de qua praecipit, in consuetudine ponit. Is enim: in architectura, inquit, decor est emendatus operis adspectus, probatis rebus compositi cum auctoritate. Is perficitur statione, consuetudine, natura. Quod praeceptum nostra adhuc aetate artifices sequi solent. Nos igitur, Horatium quo-

que e consuetudine praecepisse contententes, a vero non aberasse, facile videbit is, qui mores hominum recte perspexerit.

Longe aliter autem res se habet, si spectamus rationem eorum, qui infucatae honestatis veraeque probitatis studiosi, nil probant in omni vita, nisi quod virtuti, quam diuinitus acceptam colunt, maxime sit consentaneum, et qui consilia sua moderantur lege diuina veraque religione. His decorum, quod sequuntur et in omnia natura vident, sola est virtus et probitas. Vnam norunt artem, quae virtutem et probitatem iuuat; vnam rationem, quam ex Deo esse intelligunt; vnum consilium, quod veritatis sequitur iudicium, non sensuum atque cupiditatum; vnam dignitatem, quae omnino fugit, quidquid mentem abducere solet a Deo, quem solum sectantur. Hac mente praediti penitus abstinere solent ab ea rerum friuolarum excusatione, qua utitur

Plinius iunior in Epistola ad Aristonem, certe persuasi, honesta quidem non corrumpi in deterius, quae aliquando etiam a malis fiunt, sed honesta manere; mala autem, quae saepius a bonis, qui vulgo putantur, solent committi, non honesta fieri.

Sed quo facilius de antiqua consuetudine possis iudicare, libet hoc loco interponere, quae de seriorum temporum institutis obseruauimus. Spectaculis interesse ac frequentare theatra nefas quidem putabatur primis Christianis: mox vero, ut fieri solet, ab ipsa religione veneranda petere solebant argumenta ludorum, ut exhiberent in memoriam seruatoris, praesertim in crucem acti, spectacula in aedibus sacris. Equidem fingo mihi horum ludorum origines rudes atque inconditas; similesque spectaculis, quae Thespis olim exhibuerat. Multa enim de isto spectaculorum genere vulgo narrantur ridicula atque iocosa; actione nimirum exprimere studebant, quae

praesens facundia melius narret. Hinc
 in contentum venit apud prudentes,
 quod insipientium turba fuerat admira-
 ta; cui malo reperit medicinam sacrorum
 emendatio. Sustulit enim ea actionem
 et suasit praesentem facundiam, ut inde
 ab illo tempore, sacris istis in ludis, om-
 nis actio cessaret et quisque datas sibi
 partes sola oratione et cantu absolueret.
 Idem fere Aeschylus instituisse videtur,
 cum caedem sub scena fieri iuberet.
 Diu sacri Christianorum coetus illud in-
 stitutum sustinuerunt, quod ad nostra us-
 que tempora fere permansit. Hodie au-
 tem illa consuetudo penitus est sublata,
 ni fallor in gratiam eorum, qui pristina
 narrationis simplicitate offensi, oculo-
 rum spectacula denuo optabant, quae ni-
 si reperiissent in theatris profanis, vere-
 orne in eundem inciderint errorem, quem
 reprehendit Horatius in quibusdam ho-
 minibus suae aetatis, qui obsoleta et iam
 olim explosa denuo repetebant, pro lubi-
 tu diligentius adornata ad nouum exem-

plum. Vana enim, lubrica et mutabilia hominum ingenia semper in contraria runnt. Nec seiuncta sunt ab hac sententia, quae leguntur apud WINKELMANNUM de arte Graecorum: *Das Gute verlieret sich oft eben dadurch, weil man immer das Bessere will, so wie es der Gesundheit nachtheilig ist, gesünder seyn zu wollen, als man ist.* Nequeo mihi temperare, quo minus, quod nostrae gentis scriptor eadem de re indicauerit, hoc loco afferam. Verba illius sunt: *Dieses ist aber auch der Gang aller menschlichen Erfindungen. Muse oder Noth erzeugten sie; Bequemlichkeit oder Bedürfniss gaben ihnen Dauer; Fortschritte oder Rückschritte in der geistigen Ausbildung machten sie zur Sache des Geschmacks und drückten ihnen den Stempel des Charakters des jedesmaligen Zeitalters auf. Ein Einfall, den ein müssiger Kopf unter seines Gleichen brachte, wurde zum Spiel; Umstände und neue Einfälle künstelten daran; und machten gut oder verdarben. Dass unter diesen nicht auch mancher kluge Einfall sollte zum Vorschein gekommen seyn, ist schon*

darum nicht unwahrscheinlich, weil die Menschen
 gern klügeln: aber klügeln ist noch lange nicht ei-
 nen Gegenstand aus vernünftigen Principien her-
 leiten. In der That giebt es auch nur einen Ge-
 genstand unter den menschlichen Angelegenhei-
 ren, der seinen vernünftigen Ursprung nicht ver-
 läugnen kann, und unsere edlere Natur am sicht-
 lichsten beweist, die Sehnsucht nach einem Ideal
 der Vollkommenheit, und das sich daraus ent-
 wickelnde Pflichtgefühl. Allein diese Erschei-
 nung stellt uns auch die Geschichte aller Zeiten
 als göttlich auf, da alles andere es nur in sofer-
 ne wird, und sich gleich bleibt, als es sich die-
 ser Veredlung nähert. Was auch andere darü-
 ber sagen mögen, schwerlich werden sie der Er-
 fahrung und Geschichte eine andere Ansicht für
 den Gang menschlicher Spielereyen oder Grund-
 sätze der Kunst, abgewinnen, so täuschend sich
 auch aus der edlern Natur des Menschen a
 priori darthun lässt, dass es anders zugegan-
 gen seyn müsse. Findet nicht der Anatomiker
 oft ganz andere Resultate, als der Theoretiker
 ihm aufschwätzen wollte? Und ist der ewige
 Krieg schwankender Hypothesen nicht der sicher-

*ste Beweiss, dass die Erfahrung richtiger leute?
 Darum aber, dass dieser oder iener sich keine
 Erfahrungen zu eigen gemacht hat, sondern alles,
 wie die Spinne aus sich selbst zieht, folgt nicht,
 dass es gar keine Erfahrungen über Dinge in der
 Zeit giebt, und dass es überhaupt besser sey, je-
 de Erscheinung auf einen, zwar aus der Natur
 der Sache erweislichen, aber ihr, in diesem Fal-
 le, problematisch angedichteten Grund zurück-
 zuführen.*

At vere videor posse contendere, ip-
 sum Horatium, cum in Epistola ad Au-
 gustum dicat:

Quod si tam Graecis nouitas in-
 visa fuisset

quam nobis; quid nunc esset ve-
 tus? aut quid haberet

quod legeret, tereretque viri-
 tim publicus vsus?

et ex ejus sententia

aut prodesse velint, aut dele-
 ctare poëtae,

aut simul et incunda et idonea
dicere vitae,

longe alia scripsisse artis praecepta, si
nostrae aetatis artem ac scenae rationem
habuisset cognitam, aut in offensionem
eorum

quibus est equus et pater et
res,

si ex ARNOBIO componere imparia par
est, artes voluisset vertere, sicuti
Baubo, quae, quam serio non qui-
bat allicere Cererem, ludibrio-
rum miraculis exhilarare stude-
bat, aut si eum rapuisset amor illius, qui
CHRYSOSTOMO auctore, iocos ludosque
in artem digesserit. Qui enim omnia
metiuntur voluptate, rerum commutatio-
nibus, quales sunt Prognés et Cadmi,
aliisque oculorum illusionibus ac scenae
ludibriis maxime delectantur. Et licet
omni laude digni videantur poëtae, qui
stylo suo vtuntur ceu penicillo, quo non

verba, sed facta magicis quasi carminibus auribus plingere conantur; vix tamen esse arbitror, qui neget, his palmam praeripere illos, qui fidem pingendi artifices, apparatu scenico suam artem ita iuuent, vt et aures et oculos spectatorum simul capiant, diligenter cauentes, ne, dum verecundius id agunt, voluptatem minuant, qua animos spectatorum exple-re student, nec, quam nolunt aspernari, cum in suadendo nihil dignitate sit optabilius, dignitatem negligent: quo in genere nostrae aetatis poëtae antiquis prae-stare videntur. Ex quo enim tempore scena gaudet absolutissimis suo in genere ornamentis et machinis, apparatu-que tam perfecto, vt plane nihil sit in rerum natura, quod arte non possit ef-fingi imitandoque in scena exprimi, fabulae, quae diligentia poëtae oblectant aures, arteque mira et idoneo machinatorum apparatu oculos demulcent, non solum prae ceteris placent, sed etiam in-explebile mouent desiderium, vt nemo

praesens sit spectator, qui de rei, licet maxime incredibilis, quaerat veritate et dignitate, sed potius arte et pegmate probe elusus eam miretur, admiratorque credulus plaudat.

E m e n d a n d a .

pag. 7.	lin. 15.	leg. sic, incredulus
17.	19.	apparatu
21.	21.	audiui-
28.	16.	Graeci vero
29.	ult.	nutus
30.	22.	absoluitur
42	13	omni natura

Quae forte irreperint errata in ultimas paginas, L. L. B. B. ipsi emendent, humanissime rogamus.

